

თაგვის მაჭანკლობა

ერთხელ თაგვები ბედელში ჩასახლდნენ და დაიწყეს უდარდელი ცხოვრება. ყველაფერი თავსაყრელი ჰქონდათ: ბრინჯი, ხორბალიც, ფეტვიცა და ლობი-ოც. ერთი ეს იყო, რომ შვილები არ ჰყავდათ. თაგვებმა ღმერთებს დაუწყეს ვედრება, შვილი გვადირსეო, და მალე, მართლაც, ეყოლათ წრუწუნა-ქალიშვილი. წრუწუნა წამოიზარდა და მზეთუნახავ თაგვად იქცა. იაპონიის მთელ სათაგვეთში იმაზე ლამაზი საპატარძლო არ მოიძებნებოდა.

მშობლებმა სასიძოს ამორჩევა დააპირეს, მაგრამ, გაგიგონია? სად მოძებნიდნენ ასეთი მზეთუნახავის შესაფერისს.

_ ჩვენი ქალიშვილი ულამაზესია მთელს იაპონიაში, _ თქვეს მშობლებმა, _ ამიტომ მისი საქმროც ყველას უნდა სჯობდესო.

ბევრი იფიქრეს, ვინ არის ამქვეყნად ყველაზე ძლიერი და ყველაზე კარგიო. ბოლოს თქვეს, ყველაზე ძლიერი და ყველაზე კარგი მზე არისო: ცხოვრობს თავისთვის მალა, ცაში, და მთელს დედამიწას ანათებსო.

მშობლებმა მზისკენ გასწიეს და თან თავიანთი ქალიშვილიც წაიყვანეს. მივიდნენ მზესთან, მიესალმნენ და უთხრეს:

_ ჰოი, მზეო! შენ ყველაზე ძლიერი ხარ, გთხოვთ, ჩვენი ქალიშვილი ცოლად შეირთოო.

მზემ ალერსიანად გაიღიმა.

_ მადლობელი ვარ, მაგრამ ამქვეყნად ჩემზე ძლიერი საქმროც მოიძებნებაო.

_ შენზე ძლიერი? _ გაოცდა მამა. _ ვინ არისო?

_ ღრუბელი! _ უპასუხა მზემ. _ რამდენიც უნდა ვეცადო, ჩემი სხივებით ღრუბელს ვერ გავარდევო.

_ აი თურმე რა ყოფილაო!

რა გაეწყობოდა, მამამ დედა-შვილი შინ გაგზავნა და თვითონ ღრუბელთან წავიდა. მივიდა და უთხრა:

_ ღრუბელო! შენ ყველაზე ძლიერი ხარ ამ ქვეყანაზე, გთხოვ, ჩემი ქალიშვილი ცოლად შეირთოო!

_ მადლობელი ვარ, მაგრამ ქვეყნად ჩემზე ძლიერი საქმროც მოიძებნებაო.

_ შენზე ძლიერი? _ გაოცდა მამა. _ ვინ არისო?

_ ქარი! _ უპასუხა ღრუბელმა. _ დაუბერავს და, საითაც უნდა, თავს იქით მიკრავსო.

_ აი თურმე რა ყოფილაო!

თაგვის მამამ თავი გააქნია და ქარისაკენ გასწია. მივიდა და უთხრა:

_ ო, ქარო! შენ ყველაზე ძლიერი ხარ ამ ქვეყანაზე! გთხოვ, ჩემი ქალიშვილი ცოლად შეირთოო!

_ მადლობელი ვარ, მაგრამ ქვეყნად ჩემზე ძლიერი საქმროც მოიძებნებაო.

_ შენზე ძლიერი? _ გაოცდა მამა. _ ვინ არისო?

_ კედელი! _ უპასუხა ქარმა. _ რამდენიც არ უნდა დავუბერო, ვერ დავანგრევო!

_ აი თურმე რა ყოფილაო!

თაგვის მამამ კეფა მოიქეჯა და კედლისაკენ გასწია.

მივიდა და უთხრა:

_ ო, კედელო! შენ ყველაზე ძლიერი ხარ ამ ქვეყანაზე. გთხოვ, ჩემი ქალიშვილი ცოლად შეირთოო!

_ მადლობელი ვარ, მაგრამ ქვეყნად ჩემზე ძლიერი საქმროც მოიძებნებაო.

_ შენზე ძლიერი? _ გაოცდა მამა. _ ვინ არისო?

_ თაგვი! _ უპასუხა კედელმა. _ რაც უნდა მაგარი ვიყო, თაგვი მაინც თავისუფლად გამომთხრის ხოლმეო.

_ აი თურმე რა ყოფილაო! _ წამოიძახა კიდეც უფრო მეტად გაოცებულმა მამამ. მერე კმაყოფილმა ხელები მოიფშვნიტა და თქვა:

_ რატომ ადრე არ ვამჩნევდი, რომ ჩვენ ვართ ამქვეყნად ყველაზე ძლიერები! კედელო, მადლობას მოგახსენებო.

და თაგვი ამაყად გაეშურა შინისაკენ.

მშობლებმა თავიანთი ქალიშვილი მეზობელ თაგვს მიათხოვეს. ახალგაზრდები ტკბილად და მხიარულად ცხოვრობდნენ. დიდ პატივს სცემდნენ თავიანთ მშობლებს და შვილებიც ბლომად შეეძინათ. მას შემდეგ თაგვების მოდგმა ბედნიერად ცხოვრობს ბედელში.